

# 哲人其萎 舉國同悲

——為悼念李中襄校友而作——

中襄先生號立侯，江西南昌人，畢業於唐山母校，所習爲土木工程，而其畢生事業，則成就于黨政方面，本年六月十二日竟不幸積勞病故，享年六十有三，哲人其萎，舉國同悲，公祭之日，蔣總統特頒輓額，陳副總統暨中央黨政各機關首長及門生故舊千餘人親臨弔奠，生前友好何成濬、張道藩、朱懷永、程天放等爲之治喪，素車白馬，倍極哀榮，交大母校校友會亦參加公祭，蓋以其效忠黨國，鞠躬盡瘁，就私誼而言，損失一良友，就國家而言，凋喪一老成，際茲神州未復，感舊傷時，故無不爲之哀戚，

氏軀幹偉岸而丰神飄逸，不獨精力過人，而才識尤爲卓越，入世之初，即佐南昌熊純如先生辦理教育事業，創設私立心遠大學，成材頗衆，江西剿匪時期，參加黨政工作，即能展其所長，深爲上峯倚畀，抗戰期間，在國民黨政會及戰時新聞檢查局之貢獻，更爲國人所共知，氏平日律己甚嚴，自奉儉樸，而待人則寬厚，義之所至，竭力以赴，不計艱危，不畏權勢，其在江西省政府民政廳長任內，即以風骨著稱，大陸淪陷後，學家赴難來臺，生活清苦，賴賢內助勤儉持家，一室融融，亦有至樂，暇日喜與門人親友縱談天

下事，歷久不疲，興之所至，偶亦文酒自娛，中國國民黨實施改造後，由中委改任設計考核委員，對於健全組織，儲備人才等重要方案，獻替良多，每次在會議中發言，能針對問題，切中肯綮，極爲儕輩所推重，四十一年奉派爲立法院秘書長，對於黨政關係之運用及院務之整理卓著助勞，光復大陸設計委員會成立後，膺聘爲設計委員，並兼任國際關係組召集人，由於平時殫精竭力，公爾忘私，勤勞備至，本年四月間曾患肝疾，經月餘治療，始克復原，然白髮蕭然，漸增老態矣。最近爲草擬光復大陸重建方案，（江西省重建部份）執筆索卷，晝夜不休，雖在大病之後，亦未遑攝養，致遽櫻肺炎重症，藥石罔效，賚志以歿，目覩遺篇，彌深悼念。

氏生前操守廉潔，不治生產，故身後蕭條，遺孤二子四女，均未婚配，長子在美留學，長女已就業，其餘尙就讀臺大師大及高中，介弟士襄爲國大代表，在臺護喪，聞邦人君子，將發起籌募子女教育基金，以慰英靈於九泉，他日河山光復，祭告毋忘，則氏之革命精神與日月長垂不朽矣。